

知  
足  
齋  
詩  
集

知足齋詩集卷第十九

癸亥上

大興 朱珪 石君

元月丁卯試筆

中和殿夙拜颺同內閣班聯丹陛東堂下臣藩看舞蹈  
階前鐘鼓聽鏗逢一旬露布飛三捷八載星從敘九功  
後甲先庚思日省丁寧何術贊

天工

讀笥河詩鈔

先生詩筆何盤聲生掣龍象門虎蛟每當轉捩腕不覺  
空際擎攬隨麾標平生著錄幾百卷我曾手校煩推敲

句奇才大不收拾寧自我出母雷勦少河祕之不肯泄  
珍重竊恐神姦捎茲刻纔成十八首一鱗片甲難煎膠  
亟將全卷寄示我我雖衰老能胥鈔汰其繁蕪露生面  
摩挲昏眼猶辨清我詩媿公太庸率敢云軾轍邴有郊  
聯珠或可附前哲一任二鳥鳴嚶啁

讀後漢書

鄧禹

仲華起杖策弱冠拜司徒承制定河東駐節收桄扶卓  
爲功臣首東嚮尊許謨有子秉遺教平叔綏湟榆闔門  
何嚴肅和熹執天樞臨懼竝祖讓終以盛滿渝虧盈信

天道高朗難久居

馮異

蕪蕪飫豆粥滹沱進麥飯公孫屏大樹不以勲伐論倡  
議扶赤龍桑榆功克建無忘射鉤志君臣同大願紹封  
比蕭曹何媿金石券

賈復

君文師李生蔚爲將相器北持劉嘉書遂蒙解驂賜先  
登何其勇婦孕訂婚配率然擊郾對身被創十二君功  
帝自知敦儒修文事偉哉膠東侯聿參公卿議名成王  
霸閒剛節還就第

臧宮

君翁既吞蜀志欲威匈奴光武審黃石廣德眞良圖西  
域閉玉門北徼謝伊吾意防何深遠詎在憂顓臾執謙  
諭虎臣包桑實聖謨中興休前烈櫜甲韜錕鏐

耿弇

賊無遺君父伯昭何義勇南陽建大策志成獨推輶車  
師抱馬足疏勒飛泉涌耿氏世經武與漢業同鞏道家  
三世忌紀忠亦足重

朱祐

仲先尚儒學將兵多受降不在首級功志在定邑邦禁

士母虜掠講舍升牀枉賜蜜喻親厚故人恩莫雙圖形  
雲臺止日角輝高麗

寶融 弟子固 曾孫憲

安豐挈河西歸國固三讓洊歷三公閒恂恂蛻卿相孟  
孫著邊功謙儉保高閭伯度急睚眦贖死要无妄勒銘  
燕然功絕漠開遐曠身名嗟折鼎天道終惡亢

馬援

文淵有大志井蛙嗤公孫遨遊隴蜀閒擇主識其眞聚  
米畫形勢何異借箸論飛鳶墮跼跼銅馬式班門馬革  
誓效命矍鑠壺關遂蕙苴竟遭謗朱勃讜議陳

魯恭

劉寬

仲康論虎觀三異廉中牟上疏諫北伐仁者言何尤盛  
夏母斷獄至月勿報囚姤復順天道變理訐謨猷文饒  
性優緩蒲鞭匪競綵善政可爲則何必事距鉤

杜林

伯山挽鹿車刺客甘逋亡漆書古尚書握持獨奔藏奏  
議止肉刑法令母更張斯誠仁者言豈襲經生常事爲  
通儒式不媿三公望

馮衍

敬通負異才不爲時所賞西征賦顯志屈騷同愀惘發

憤武達書鄰里爲蹙額禍嬰剝牀膚鬱鬱攄倣儻傷哉  
文士窮安得凌雲上

孔奮

君魚治春秋清潔守儉約脂膏不自潤單車萬金卻武  
都何厲勇妻子甘賊膊晚年有子嘉天道憐忠魄

張堪

君游稱聖童讓產厲志操狐奴開稻田桑麥民頌禱折  
轅與布被清風足嗟悼一聞樊顯言感概褒揚詔

廉范

叔度何磊砢負喪俱溺沈鉤得更追賻固辭不受金鄧



融怪其去侍獄何盡心似我故功曹訶之不肯任獨收  
薛漢誅帝怒不可禁卿豈廉頗後志膽敢爾深三頭熱  
火炬遂破匈奴侵夜作不禁火五袴歌至今慶鴻交勿  
頸嚴麟濟嶇嶇東漢尚節義古風誠足欽

鄭元

康成實達儒馬融謁樓上著經百萬言孔門推大匠公  
卿表通德北海譽允諒龍蛇夢宣聖此理亦无妄益恩  
旣殞身小同死可愴大賢竟不世斯文庶未喪

賈逵

景伯善問事語稱賈長頭尤明左氏傳大義能闡幽世

儒方蹈故攻之若重讎繼飾譏緯言參龍處者劉陳元  
亦琿琿范升徒刻舟儒宗數鄭賈卓爲經學優

班彪

子固

馬班皆繼世叔皮恬且貞孟堅旣博貫研思國史成鴻  
文賦兩都馬揚畏後生典引不足奇沿襲非正聲趨哉  
良史才千世標典刑

朱穆

公叔貞而孤兼資文武材三復崇厚論用意振澆頽懷  
慨著絕交不與鷗鳳諧及爲冀州牧志清諸姦猜祿仕  
數十年蔬布無餘財斯人亦足風文忠何媿哉

陰識陰興

陰氏祀管仲謂之爲相君其先陰子方至孝有恩仁臘日竈神見再拜受釐親獻以黃羊牲巨富連廬困識興因椒戚戒侈能恂恂神道固幽贊亢龍防其迤

陳寵

昭公習律比議法常依輕不貪百金利祖戒惟持平報重盡三冬無傷三微生冬至三歲首三代通爲正三王建春月此義獨發明刑禮本相應去取三千成趨哉經學美可闢俗儒盲

王充

仲任善潛思論衡八十五中郎枕中祕異書實足詡養  
性十六篇頤神自張主雖靡夷吾薦豈肯應世取

王符

節信無外家發憤潛夫論五篇九卓犖愛日惜民困雁  
門二千石不如逢掖異愼赦亦偏辭何如持平憲

仲長統

公理戒高幹遂有知人名卜居樂清曠呼吸思和精蟬  
蛻龍蛇閒星霞掇寶英昌言一著錄損益先兼并斯人  
豈忘世才章繼西京

申屠蟠

子龍眞猶龍泥蟠不肖信蔡邕深重之至行守道眞江  
夏會名豪默爾獨不言先見處士橫不與太學論終能  
全高志考槃嗟碩人

楊震

秉

賜

彪

伯起起宏農四世紹清德暮夜卻兼金天神爾我識五  
疏何伉直宵小肆讒慝慷慨夕陽亭大鳥悲沾臆秉也  
尤淳白自守三不惑賜也對虹蜺板蕩喻虺蜮彪也失  
愛子垂老困愁賊嗟哉累葉盛天道有盈昃

張衡

平子賦二京瑰麗班都右靈憲擬揚雄覃精八龍首應

閒文旣奇思元騷更助四愁聲調楚長歌舒窈糾斯文  
通三才崔瑗服膺久

馬融

季長實通儒擁坐疎小節勸諷廣成頌亦頗事功烈廐  
長上東巡召拜郎位列取侮鄧與梁詭遇名亦裂慙說  
盧鄭徒高才貽玷缺

蔡邕

伯喈性篤孝博學尤多能解紛作釋誨遺俗存正靈上  
書條之事刻石定六經忠言奉密詔避禍周紀星晚遇  
懷董歎見忌允失刑漢史誰著錄有女空零丁

李固

子堅挺奇表繼父爲三公對策發讜論謨猷睿孤忠扶  
持三絕統周旋椒戚凶如何折鼎足羞與廣戒同奇哉  
文姬智匿孤爲酒傭嬖也亦無忝弦直載良弓

杜喬

叔榮狗兗州表奏太山守金蛇不肖假結怨違凶醜正  
色無回橈李杜齊名久鼎尸橫城北楊匡義不負郭亮  
與董班斯人同不朽長嗟時事乖烈士空戎首

范滂

天地方閉屯賢人宜隱遯如何違括囊自取瘖瘖用孟

博實清流登車矢素願宗資重其名膺密同靖獻哀哉  
慈母言行路猶齋恨濫觴甘陵謠正直禍滋蔓善豈不  
可爲危行言或遜

郭太

林宗善人倫臧否兼勸獎李舟旣登仙陳慤邦無仗人  
旣幸色舉天廢歎乾象蔡碑無媿辭黃陂羨滉瀆平輿  
有二龍不如有道榜

孔融

魯國有男子才疎志瑰磊猛虎在深山藜藿爲不采狎  
侮卓與操抗議驚姦鬼漢祚不可支殺身亦何悔秋霜



比琨玉鸞鍛空文綵禍衡更何辜鸚鵡傷華瓘

皇甫嵩

義真勇且忠遂摧黃巾衆百姓歌安居朝政方倥偬閭  
忠效蒯通守節不受諷幾遭董逆毒孝子誠感動鴻鵠  
備未平幸脫虎牙龔美哉不矜伐恥彼蠻觸鬪

朱雋

公偉資孝養起家交趾功大鑒宛鄂間不與牧伯通奉  
詔不俟駕持節鎮關東崎嶇僱汜間智勇詎不終伊尹  
志則可小諒胡可同

王渙

稚子起功曹政績著洛陽  
擿姦有神算理冤無侵傷  
清名歌樂府立祠安陽傍  
朝廷錄其功遂與朱尹方  
天年雖不永遺愛同甘棠

孟嘗

伯周爲郡吏抱牘孝婦冤  
更陳後太守時雨解旱愆  
治郡遷合浦去珠訝復還  
捨官隱窮澤兼金甘抵捐  
雖蒙楊喬薦肥遯嗟遺賢

邊讓

文禮負異姿麗詭章華賦  
伯喈所特薦寶鼎函牛具  
謂比顏奇倫周雖集振鷺  
孟德實忌才厄罹孔禍數  
哀哉

亂無象鸞鵠絕吭噤

龐公

德公隱峴山官府不能屈臥龍拜牀下耆長胡敢拂妻  
子耦耕耘鴻鵠遠羅罽采藥向鹿門長往遺塵拂蓮茂  
高風邈詎肯暫充詘

天竺

身毒月氏東其方稱佛國發夢自漢明流傳徧中域騫  
超昔無聞周衍或未識化人樂華胥禦寇非臆測精靈  
有起滅此理久不惑空有兩俱遣猶龍同一得何去何  
從乎知白而守黑

讀前漢書

刑法志

吾欽漢孝文天性仁且厚斷獄致刑錯與民得老壽矜  
憐緹縈言肉刑改笞梠更除坐收律何媿民父母孟堅  
引孫卿巧言吾勿取非屢與赭衣不信古含詬使民戰  
栗意孔子亟深咎

劉向

子政屬宗親通經抱忠鯁頗好神仙言祕方鑄金礦上  
書獨切直同心託堪猛指明梓樹徵劉王著天警反覆  
數封事義取屈哀郢惜哉子異趣譎張覲秀穎

萬石君

石奮起中涓孝謹勝諸儒不言而躬行子弟能步趨建  
也滌中牕譏之者過歟慶也策數馬致身相封侯叶雍  
容里閭內不以貴自渝美哉此淳化德行真上模

賈誼

賈生抱異材通達比伊管所言非不用顏卓生苦短治  
安六七策衆建實善算豫教及張維訐謫何侃侃發憤  
弔湘流自傷周鼎幹觀化賦服鳥聞道言命罕傳哉第  
一流宣室傾天亶

汲黯

長孺社稷臣不與宏湯比淮南憚其節直節能守義頗  
好黃老言清靜民自治東海與淮揚臥理法簡易上所  
見禮敬不冠望而避何如大將軍狎侮方踞厠

賈山

賈山奏至言借秦以爲喻其文頗剴切汗漫迷指趣是  
亦策古流射獵非當務宴游不失樂異言巧巷過不如  
誼也醇定勝詞有據鄒枚亦辯才閭侃可竝驚

路溫舒

長君牧羊時截蒲編寫書學成爲通儒迺上緩刑書救  
時傷獄吏仁言戒刻膚意篤何悱惻秦法慘未除可爲

百世則醇乎媿仲舒

竇嬰

田蚡

魏其竇后族著有七國勦王田本異姓曷以甥舅論蚡也況真詬漢廷誠無人權勢互傾軋杯酒起旤因武安在者族厲鬼早殺身灌夫夫何爲磨牙狎媿羣安國亦首鼠顛墜空蹇屯

河閒獻王德

河閒好求是得書多先秦獻樂三雍官折中指事醇淮南亦好書鴻烈博管荀楚詞且受詔食時已上陳如何希无妄豈若端厥身奕祺慕賢哲六籍傳其真

李廣

將軍七十戰未嘗當單于射虎乃飲石爰臂橫匈奴屠  
降八百人失侯天匪誣報忿霸陵尉睚眦怨何如東道  
少回遠數奇到自殊桃李雖不言流涕悲士夫陵也隕  
家聲柯盟志竟孤

蘇武

子卿持漢節燼火死復生齧雪更咽旃牧羝掘鼠鼯北  
使二十年鬚髮盡霜莖歸爲典屬國祭酒優尊稱圖形  
麒麟閣烈興方召并有子曰通國爲郎紹宗祊

董仲舒



董生王佐材褒然儒學首所對皆醇正鼂孫豈其偶獨  
崇春秋義扶陽陰不糅爲治尚德教受大勿小取推明  
六藝科尊孔百家右大議輒就問庶比魯鄒叟

司馬相如

長卿未遇時佻達頗不羈賦才麗屈宋上林何瑰奇攤  
天奏大人帝有淩雲思乘傳諭巴蜀被錦耀一時中閒  
諫獵書忠愛差近規阿世封禪文雄奧何補裨獨以文  
采論揚班難攀追

卜式

卜式雖弔詭牧羊去敗羣斯言詎小道可以通治民烹

天乃雨直讜亦可欣致身青雲上  
鹽鐵罷算緡畜肥  
師百里庶近黃老真

兒寬

兒寬帶經鋤奏讞得上可經學  
節吏治課最輸租夥天  
子建中和登封神佑妥褚大既心服發社闔靈璫遂爲  
儒雅宗何嫌都養瑣

司馬遷

子長良史材文章何卓犖著書繼春秋發憤遭刑極上  
溯軒轅紀下迄獲麟角經緯數千歲網羅實鴻偉壺蒼  
義高朗安書痛呼譽班贊稍抑揚巷伯譏大穀後儒過

輕軒龍豬喻朱確疎密兩鉅手竝峙標華嶽

徐樂

徐生起無終上書辨土瓦獨觀安危機銷萌在拱把其  
言推數理易動慎民下誠知二體明何憂七國侈嚴朱  
吾主父橫議可姑舍得一斯畢萬奚用炙轂輶

王褒

子淵負高材雅與馬揚埒中和樂職詩何武歌雅說試  
爲得賢頌明穆比禹契洞簫讀奇文後宮猶擊節益州  
祀碧鷄道逝傷鵽鳩

東方朔

曼倩真大隱遊戲仙者流大言自稱譽譎諫匪競綠時  
復伸正義摧偃戒逸遊客難及非有自比伊呂儔戒子  
工柱下知道隨湛浮好事或附著異聞夸十洲

### 車千秋

千秋上急變子弄父兵笞夜夢白頭翁教臣上言之武  
帝大感悟高廟靈指麾言人所難言公當爲我昆遂封  
富民侯取相旬月期受詔輔新主功業會有時小車賜  
優老異彼賀屈輿

### 梅福

子真條急政若火始庸庸王氏執魁柄呂霍奪漢宗

言至深切十月歌咎凶又言建三統宜紹孔子封家居  
善養性仙去疑絕蹤埋名吳市卒逸民成孤忠

趙充國

翁孫被創夷天子爲嗟歎及其壁金城老謀何赴桓釋  
罕圖先零策羌計必完屯田十二便坐勝議不刊當爲  
後世法豈獨旦夕安圖形竝作頌方虎歌師干

甘延壽陳湯

甘陳立奇功庸庸怪而詆手斬郅支王縣頭橐街邸擅  
興固微幸改年告郊時向永爲發憤耿育痛傾圯權衡  
功罪閒何以勸虎士彼哉匡與石媚嫉吁可鄙

雋不疑

不疑帶劍謁勝之納其戒賢哉有慈母平反母枉逮京尹說經誼附會輒拒蒯斷章適因時夫子固不爲公羊雖墨守素臣斯爲最

疏廣

疏受

二疏傳太子知止遠殆危祖道東門外觀者感而唏黃金請族舊田宅夫何爲功成身遂退賢哉百世師貪榮計孫子徒爲達士嗤

于定國

定國爲廷尉民自以不冤善稟于公教食酒益精專迎

師執經禮決疑哀寡鰥仁者必有後永亦爲大官高閭  
容駟蓋天道蓋可言

嚴尊

君平雖湛冥星漢懸高名與人言忠孝匪獨善厥生子  
雲亟揚詡貴德豈其卿下簾著老子壽考道自成李彊  
所浩歎千載餘風聲

貢禹

少翁性質直建言復古風王者宜法天女寵滅後宮廐  
馬及苑囿大損歸田農民毋早出算鑿地藏虛空贖罪  
教姦宄財利相守崇絕源修節儉庶幾成康隆黃耆八

十餘史魚比直躬

龔勝

君賓不事新絕食死漢室薰膏自燒銷天年不得卒老  
父爾何人惜其名害實觸然不受汙志士明皦日

鮑宣

子都善直諫七死與七亡深陳天地戒名儒得包荒日  
蝕于三始白虹蚺天陽人悅天意解翬翬攄忠良千人  
會舉幡守闕遮孔光王莽翦異己遂死亦可傷

韋賢

元成

長孺號大儒七十餘爲相致位八十二兼金榮賜貺少



翁代爲後起家數辭讓臺臺自責詩車服謹無曠獨申  
宗廟議親盡罷灌鬯有舉莫敢廢夢譴詎虛誑

魏相

弱翁抵霍蠲遂起據魁柄不肖黷言兵便利遵前政其  
陳陰陽言亦取順時令修明練名實中興無裨政同時  
稱賢相謨謀會際盛

丙吉

吾欽丙少卿陰德誠楸哉閉門拒使者所活億萬該曾  
孫真天子將護倍憐哀絕口不伐善疾甚非死裁馭歐  
丞相茵舍之報烽埃駐車問牛喘少陽恐錯絃蔚爲中

興相輔佐光衡能

京房

君明傳焦易得道亡其身所言既屢中考功能別甄道人當逐死正先趣亂秦消息竟不效蒙氣空輪囷

蕭望之

長倚雖堂堂不撓近剛者爭名殺延壽何以調鈞冶元帝苦柔闇南箕肆侈哆朱游亦行行鄭朋尤猾夏果然殺吾傅卻食橫涕瀉哀哉邁參併誰與支傾厦

匡衡

孔光

稚圭善說詩爾雅頗醞藉治性強不足精禮動教化又

言萬福原情欲慎夙夜粹然豈不文古道難抨射舉光  
方年少再相或慙霸依違元始閒翻同腐鼠嚇

谷永

子雲真大黠乃以訐爲忠依倚權椒勢批鱗刺深宮其  
言雖痛切有挾非至公成帝寬而文面受耳則充指陳  
三七厄狂瞽戒豈空

揚雄

蜀雲嘿湛思著錄巨萬言儒宗實巨擘韓馬咸推尊臨  
江弔湘纍反騷龍蛇存四賦麗而偉班張不足論解嘲  
義宏衍雷火遊神門攤元挽周易覆瓿闢大園法言墓

論語品藻參淵騫紫陽責賢備特筆誅莫原豈繫彭聃  
流不計商周年

儒林傳

漢武立博士五經道始開易楊書歐陽詩四禮曲禮春秋  
秋宗公羊穀左後更恢古文出孔壁逸書誰能猜與其  
過而去毋寧葆燼煨殷勤諸老翁求舊珍盤疊不猶愈  
於野箕子方滋芰

循吏傳

郡守分天工治民宣教化安得盡長者耆幼樂耕耨文  
翁興學校潁川美黃霸朱邑祠桐鄉信臣行田舍龔遂

請安之盜賊亦皆罷當時治蒸蒸何用矜勇詐庶幾游  
仁世孝友睦婣婭

恭和

御製元旦喜雪元韻

元日欣霏三白霽臘中還見二陽亨邊隅早報螟蟲淨  
京輔先占薺麥榮梅萼松根增秀潤瓊樓玉宇并光瑩  
天心矜蠶

皇心愜億兆臚歡獨保盈

疊前韻送偉人太傅歸韓城

關西夫子志節崇冠雀銜鱣翔講宮起家高甲冑台輔

正直謇謇勵厥躬力辭樞密介于石屢告休沐翩如鴻  
七年功竣快洗甲元日雪後徵綬豐扶筇兩足健且駛  
渥綸三錫

恩方隆歸軒桃林散戰馬望氣紫蓋連關潼同朝鏗奇  
詩滿冊老彭椽筆爭雄風吾衰技癢力不勁欲罄情話  
難爲工大賢推讓孰叨竊畫錦獨樂眞鉅公慙無硬腕  
門斟雉吉甫爾雅言由衷

恭和

御製同樂園茶宴諸王大學士及內廷翰林用平定三  
省教匪聯句復成詩二首

卷阿今日快賡吟七載先憂慰

聖心天道方謐劍轉復時徵正際泰承臨清陽無量番  
春肇集地施膏尺澤深誰識籌民

宵旰久喜翻倒劇翠雲襟

獬犬封鯨楚陝川蕩平眞見太平年八方蜡報寰中慶  
卜種魔空教外禪玉馬瑞騰六出雪燭龍銜照九華蓮  
至誠呼吸高穹佑恭儉先勞獨永肩

韓城相公疊韻賦別三疊前韻敘舊荅之

齒德爵三孰比崇憶從衡校春闈宮戊戌我參同考列  
敬公虛受兼直躬辱公知我訂婚媾我聞公浙遵達鴻

舍如始修

微雨

微雨一以潤自然夜氣生句萌怒奮達庶卉欣向榮我  
園漸涉趣流水碧且盈山桃開最早杏柳相映明粲粲  
盆中華移植庭縱橫草木喜得土魚鳥游寬宏於此觀



物性在我何慮營

牡丹蘭花開以少見貴用張南湖芙蓉詩卻字韻  
倣其體

愛花不著花飲酒不滿爵有如讀好書隨意觀大略豔  
冶當春時吾豈獨靜泊蘭秀挺幽芳牡丹敷醅萼招呼  
二三友賞以提壺酌朝昕瞰映奩夜露弦輝閣色妍女  
嬋姸香闥靈交錯坐起往復還獨賞思衆樂林園涉有  
趣頗似脫軒鶴少美況兼攬懷抱此暫拓花如解我意  
笑嗟心已諾試看菱尾春如水東赴壑安得指翔陽徘徊  
駐景卻妙立汝何爲荏苒懷娟弱花神本不二環序

期久約

芍藥花開六首

千催萬喚花始開  
豔姿半吐如瓊瑰  
其餘芍藥不記數  
含嫣笑顰猶藏俚  
主人待爾已三日  
急呼好酒澆金杯  
園中嘉客來不速  
不須肴蔽惟支頰  
有能詠者疊百首  
或以繪事烘丹艱  
花如解意應敷態  
一發匝月摘錦堆  
朝探暮醉不知倦  
晴雨風月長徘徊

夙興問訊花連開  
自公退食看幾回  
絳綃袒露半臂錦  
玉奩淨印瓠齒台  
花應喻我故作態  
頻移几席來相偎  
夢翩好鬟睨而眄  
凝脂醃頰心愉諧  
盛妝雅舞遠忽近

勸我侑進青霞杯沈沈雲陰天欲雨招招仙袂香拂埃  
有情芍藥洵如此遽然已報花重臺

好花三日嘉賓來提壺挈榼同岑苔主人不辭客白適

蜂酣蝶栩歡無猜溫其君子粵海秀愛花未投玉鏡臺

溫步容爽約未到

萬章賢者劇好辯畜池竊恐生魚災

萬和吹

劍晉人漫一呖蒲葦觀水勞往回

戴東山

大癡丹青擅清

峻袖手閣筆胡爲哉

黃左用

微雨纔過百井潤園林生色

腴枝蕊對花酬唱自今始將離匝月夫容開割麥插禾

鳥聲樂神龍應鼓鞭雲雷

遲君三日花毵毵

招溫步容侍讀

君如不顧風且顏封姨狼藉

亦可惜水南才士胡適何錦城步障那堪護明妝照夜  
雲茶堆隔牆宋玉不窺鸞方丈居士空如灰憶昨鸞枝  
豔于火成蹊載醪思穴隙芳時須及顏色好莫待攬鏡  
憎星體無肴尚可煮陸菟解渴且試聆酸梅

八义才子移樽來

溫步容  
侍讀

隔牆喚酒花繁開紅鞵鞞

舞汗駿玉盤孟照醜瑤臺歌鐘貴客漫誇與洛陽紫鳳  
園林魁

魏觀察  
在坐

乞鄰而予真措大拔葵差免公儀歛安

得神淵三日寫坐見億頃濡牟秣清和萬卉盡葳蕤池  
水綠漲荷華隈石榴火浣染雲白薔薇蔓發香雨梅  
鬢如軒舞仙禽胎頰如玉暈酣輔頰夕陽射豔光滿煜

弦月夜露濃潏醅眼根色界不可說若有素女飛空來  
瓊花觀中殷七七珮環珠唾香九閨我今靜對雨無著  
但覺鼻觀霏皚皚金屋千春嬌欲貯雪鉢一瞬迦可咍  
長年花期美無度隨時嘯詠供蹋踰

知足齋詩集卷第十九終

知足齋詩集卷第二十

癸亥下

大興 朱珪 石君

感興二首

喬喬百尺榆鬱鬱千株柳蟠根地防固膏露天培厚柯  
葉貫四時蔭芾葢十畝颺輪夜半發拔撼蛟虎吼豈知  
衆夫芘坐見枯株朽其旁有附枝榮榮敷華綬牽牛尚  
引蔓游龍亦被藪乘時各得所何用齊類醜

小材爲榱桷大木爲棟杗架構支巨厦當無用乃章巧  
黠競小知解脫觀大方誰能逐豪毛得失同亡羊昨宵  
觀時雨雷電助其滂萬卉改顏色鼓舞蘇巫尫方知造

化力施德疇取償  
霄開帥以閉無言亦無將

香山行館燕巢

香山適行館爽塏居三閒  
翩翩雙燕子梁棲往復還  
我亦暫賓主顧爾鳴且翾  
芹泥近取拾昕夕弄閒關  
蓬島望咫尺可仰不可攀  
羨爾得遨遊翠微繞回環  
卵育遂其性底用誇鸛鵲

回園居

去園甫五日枯藤忽生花草木何欣欣  
茂育亦可嘉芍藥花雖過薔薇正濃葩  
池水環周流入夢澄無涯云此最祥吉  
脈絡無閑遮卽事誠足悅寓目忘滓  
豈安得一

夜雨百穀蘇禾麻

喜雨

四月十九日

萍號欲起飛廉鬢擘雲截斷女魃囂乾沙攪空退飛鷁  
睡驪蜎縮魑怒嗥

聖人憂民獨責己

宵旰精格通肝蒿

今早

召對

己形于言色至誠無不格也

上憂勤責

紫皇

遄詔斥風伯九龍應響鶴唳臯日午氤氲撒大羃漸噴  
香霧霏絲縑晡時瑟瑟瑤萬瓦少女不動鄰虛毫津莖  
濡根滴天乳唾珠噴鳳鳴靈璫天心

聖心轉圓捷先憂後喜謔不諂嗔嗔衆生呼佛力豈識



帝澤酣衢醪高哦快舞獻楓座樞機桴鼓靈臺操志孚  
氣暢無壅閼消沴召順恭謙勞綿綿在宥信如此壘壘  
時雨承

天膏

家中枯藤發芽

經兒來園中報我庭前枯藤葩我庭植藤四行列其三  
春蔓一已槎兒童攀戲乾欲斷與僮屢請尋斧加我姑  
舍之俟暑雨覬望萬一抽萌芽豈意前宵膏沐潤城郊  
廿里三株華園林雙映紫綬藥婆娑四美簪盞嘉生梯  
詎兆女妻過成實或覩嬰姪車徵休謙益敬天道願

霖澤豐蓄畬

題萬和圃學士所藏銅雀瓦硯次歐公荅謝景山  
遺古瓦韻

確隤有物用不銷古瓦拱壁題品高金虎冰井鄴竝  
建安銅雀螭獨牢臺傾瓦解岸谷變物化兔角吹龜毛  
陸沈不數星隕石誰抱瓴甕鼯狐咻流傳文伯巧剗淬  
遂發光怪銘勲勞涪翁磨崖本鉅手錐鋒螭扁織螭  
得茲雙井厥和璞鳳咮龍尾書尊堯猩毛蘸撫揮玉版  
鎖江醉飲鳴鼎槽晚樓南樓記家乘望斷北雁翔歸  
常主翰墨器求舊鼻祖江右鶴九臯千年顯晦落幾手

溷埋沙礫拋硤岩磷淄駟市琴爨尾邂逅捆載牛壓腰  
萬君識寶鄰義取岐陽碣鼓風馬蕭艾城鄉里洛異洛  
氏曹不筆當塗朝俗鈔改竄析眞厲實事求是芟莠蒿  
屋除字體更典則西陵誰弔牧豎燒摩挲千日亦不厭  
豈獨潤膩宜池凹君今玉堂好清供天上金匱隨濡毫  
分寧瓣香弄衣鉢流別風雅無譌淆南踰珠海北樺嶺  
輜軒水陸重錦包庚庚脈橫隸古定乙乙陰興龍梭縑  
虎頭慎防夜半壑蜃幻漫鼓江心濤有時劒拔浣花杖  
莫矜犀照晶宮妖磴奇戲聯石鼎句堅厚不礙昆吾刀  
才孱力薄赧六一浮我大白羞江瑤

護花

護花開金尊勸我能忘憂憂樂各有懷  
迤逆那自由止觀靜如鏡旋轉逐所投  
似爾蘂與葉榮落隨春秋雨露旣滋息  
暄暘亦敷抽庶草自有時奚必攀喬樛

喜雨歌

二十三日

黑龍頭角游巔峴

聖人步禱升降壇齋心晨達玉音下  
密雲布護彌天寬風伯退聽百靈驟  
豐隆抱鼓視椽欒乙宵迷濛徹旦瀉  
淙淙雷瓦鳴迴湍昨日

宸顏憂今朝

宸顏喜盱衡民瘼亟驚寵天聽駛憂樂先後惟民同呼  
吸誠感眞天通專精一意迅景響萬神襍沓填虛空老  
農穡穡擊社鼓龍骨高高挂梁柱小兒牛背叱復謳割  
麥插禾聲在樹我園潤澤草木香蓮池碧漲盈周塘菖  
葵五色高過牆酡頰半酣濃照妝藤陰上架藥葉大金  
萱石榴渥有光勤雨時雨佳若暘歌以言志方未央

題青山集

李孝廉慶英寄予青山集三十卷續集五卷爲  
當塗宋孝廉鉞等重刻本請予爲序按先兄竹  
君所進錄於四庫全書集部第七者實續集七

卷今少二卷豈有所闕并歟考功甫在宋史文苑傳稱其母夢李白而生祥正梅堯臣歎爲太白後身譽之至矣傳又摘其諛頌王安石安石恥爲小臣所薦因極口陳其無行一若文行瑕瑜不掩者是以總目中亦有褊躁合離之論然或其少年弔詭鬪捷捭闔不羈者之所爲而荆公矯枉沽直遂致流傳詬病其實當時朋黨出入之閒亦未足以一節之不檢確然定其邪正之歸也今讀其各體詩豪邁縱橫頗有不屑踟縮溝渫之態平生枕肱青蓮亦可謂尚友百世

之師者若夫太白凌蹈虛空俯視滄海實有英  
光浩氣溢乎毫墨之外又豈可以侔色揣聲片  
鱗半爪遂頡頏而抗駕之哉語云先生之志則  
大矣以之侔食青山祠列之北宋名家亦不負  
其睇驥千里之願也已并志以詩

青山拔起凌江濱遠與蜀岷連支垠神人騎龍戲空界  
攀援猿鶴稱兒孫太白光芒燄萬古誰其匹者少陵杜  
幾人淬厲規雷礪獨上雲梯夢天姥歐王坡谷北宋豪  
浪士竊比青蓮高滄浪清濁或自取詩文流別隨風騷  
送迎海外倡和詞臭味亦復無差池古劍雙投醉竹燾

秦同傳夫何疑

恭和

御製夜雨朝晴適值還宮齋戒郊外卽日喜成元韻  
依旬日雨恬箕伯殷脈其雷達礎楹月窟子交和氣浹  
方壇寅致

惠心誠倚衡潤綠宜郊望攬轡晴紅鏡曉行應有衢歌  
歡九陌普存

塵抱在謙盈

題顧小厓先生古香圖遺照

名成天

梅花見天心不藉橐籥吹伊人葵藿抱特達升日曦邈



迥實千載謂是騰上姿豈意山木性不改猿鶴期巖廊  
邱壑閒位置孰最宜披圖景其人廣受眞吾師

### 荷花

荷花周遭百頃餘平鋪紅雲錦不如西南絳帷丹羅襦  
曉妝開奩晃瞰樽彤幢迎導羲和車灣環飛浴鴛鴦  
彩霞拖虹影方諸翠蓋繙帟萬姪好中露皓腕凝脂膚  
玉女淨濯不施朱反照火軍閒如荼夜月半吐銀蟾蜍  
雨露噴唾傾圓珠左右眄睞香徐徐一日百匝揚清臚  
蒼松垂楊兩岸疎穿插不盡菰菱蒲迴塘繞屋卉蕃敷  
休夏自恣夢蓮蓮田田四游濠梁魚不知孰樂眞華胥

伏雨

伏雨聞半夜萬彙咸昭蘇大哉造物仁不使一物枯起  
視我國中菑舊何敷腴千柄閒千朵紅白酣而殊遙想  
萬頃碧梁稻翼且與黃河淤已開雲颿轉軸轡銜尾過  
析津飽食粳糯稂靜觀詎獨樂敢忘民艱虞

恭和

御製六月朔日作元韻

初庚連日癸壬雨開朔今朝甲子晴德水安瀾神運速  
叢山通棧武功成徵時五敘惟

欽念進業三登致泰平憂樂同民先後異獨參天道酌

盎盎

雨後

前年六月朔日雨泛溢欲漲昆明湖今年朔晴腊日雨  
點滴入土如膏酥肝衡我園好籩畫芳樹醲沐茄葩敷  
紅盤珊瑚白晶玉萬舞狎獵瓊霞裾游魚自躍錦鱗尾  
倒影好見金蟾蟾縱橫廣袤一騁望芙蓉城擁千麗姝  
羅浮巨蝶戲仙陣九光雲海鋪天都江淹李白好才筆  
誰能貌出真雲茶濂溪愛蓮但有說太華玉井徒形模  
朋來不速觀不倦攬結大意清而腴色香如此說不得  
法華試轉西方無

恭和

御製消夏八詠元韻

閱摺

清明開夙氣倍覺見精和如水衡斯澈非煙鏡不譌  
折衷惟握要執兩自該多無我知言妙青空萬象過

召見

殿陛勤敷納人思効顯良薰風跪衽襲初照咫尺暉詳縣  
鑑誰逃影因材自取臧

求民咨暑雨何地更招涼

觀書

成憲監于古多聞觀在書日長午晷靜心洗酉編除熟  
解披文富新知得意徐  
聖希焉不學沉對景悠舒

淪茗

品水玉泉近煎茶蓮漏中何須淪冰雪不覺失炎融鉢  
石霏花雨鎖煙濛竹風蓬山眞在處下界漫嘲全

披薰

火庚當溽暑解阜鼓時薰有起穿葩葉無聲靜觀聞自  
天隨長養因地振芳芬

虞舜揮絃意千階早靖氛

對雨

日雨日暘若油雲忽羃天密看如散縠遠望久凝煙禾  
隴青肥稼蓮塘錦漲泉勤徵

宵肝切茂對自今年

舟中

液池通 禁籞彩鷁

御輕舟自愜壺天賞眞同鏡海遊觀瀾沿遠嶼拾月印  
芳洲經涉耕畬處咨農慶有秋

池上

曲池濠濮意不夏更何消況適晚生籟迴看峰影標火

流將熠熠雲起致飄飄淨洗明河甲

天心慰旦宵

兼翰林院掌院學士到任日恭紀

五到蓬瀛閱逝波

戊辰館選乙未再入翰林已未教習庶吉士壬戌協辦大學士今掌院凡

五到衙門矣

巢痕難問舊同科

同甲者久無人

森森竹箭干霄起袞

袞驂驅掣電過器識深沈期鶴立文章爾雅重鑿坡祇

慙老我餘衰蹇得際

姚階慶止戈

恭和

御製夜雨朝晴元韻

秋宵宜稼得優霑  
恰喜銅鉦挂曉暹  
伏過三庚消溽暑  
節交七月洗流炎  
環畿千里歌與翼  
絕徼么妖敢匿潛  
貯蠶豐融惟

佑順依旬時若愜

心占

恭和

御製經略額勒登保參贊德楞泰奏報三省底定餘孽  
全平詩誌感慰元韻

蜀山八日捷書呈楚徼秦關盡蕩平  
小蠹經年紆五夜  
中元佳節慶西成  
紅陽掣電今歸馬  
赤手傾河竟洗兵



神武止戈先禁暴

王師擇將利行征民勞亟用綏豐屢士勇尤嘉恤踐更  
喜氣星雲正高朗休徵草木亦蕃榮賡颺衆籟同宣豫  
宵旰單心愈惕盈長此萬年無逸所

昊穹鑒德在惟誠

阮雲臺中丞爲我選刻知足齋詩作此謝之

吾性非嗜詩尤不工於律少年忝詞館職當親佔畢中  
閒多疾疢不敢究編帙讀書得大略汎覽無專切三十  
始遊宦吏事紛糾葛經年癡嘯詠書味久契闊重來鳳  
巢舊更直

龍光暫丹鉛勤磨研經籍敬講說

恩際文明盛學殖敢荒逸屢膺星槎使屈勉校甲乙當年有哲兄著作蜚弧揭門牆正敷藹中道忽摧折居然求典型近似擬蘇轍自從辛丑後稍覺積翰札詩本道性情心源派流別巨細各爭鳴風雲貫蜻蛚我衰耄將天豈敢溷剗厠阮君治經義政學美兩浙斐然鈔拙草阿好愛不割李司馬陳編修皆博雅校讎精雌蜺授梓賡芸壽祺竟成編十存幾六七覆瓿與享帚悔多功苦搢作詩謝吾友求名疇得失吾將師老莊文者道之竊

恭和

御製啟蹕幸避暑山莊卽事元韻

金天塞爽正高秋

玉輅時巡紹

遠猷豈獨驅劉威克詰因思馬馭德馴柔雨暘從欲惟  
星好螟螣無遺已窟搜吉日辰良看豫動

翠華擁導靄煙浮

恭和

御製曉行密雲道中喜晴卽事元韻二首

近甸山城

萬乘過遠陬新奏靖弭戈白檀白馬當年險黃洞黃雲

接日多昨夜萬花雲出岫今晨三派練交河豐登象已  
徵綏屢夾路還看飽穗禾

不愆旬澍最宜耕況是崇朝每快晴多黍多稌高廩稼  
買牛買犢庶昌榮

天顏恰爲盱衡霽

帝力渾忘熙皞氓馬首北東迎紫氣勞謙長此

念持盈

恭和

御製度青石梁元韻

東瞰高射石梁西汗駿無聲扈萬蹄礪磴干霄盤道上

天關迴首障峯低飛泉漱玉鳴珂雪遠樹拖虹染碧蹊  
瞬望

雲罨升下穩

乘黃掣景度霜批

恭和

御製避暑山莊成什元韻

列水鍾峯選勝莊高山天作澗過皇邇安遠格環殷頰  
武烈

文謨謹憲章暑雨漫咨加潤澤秋陽有照徧容光萬年  
垂裕欽

家法無逸幽風意不忘

恭和

御製含青齋元韻

深峪哈呀北亘南青蒼一氣景能含當窗近遠空收勝  
排翠高低秀挹酣暎出扶桑先照檻雨餘懸瀑注歸潭  
因時

茂對秋偏好玉露金風四望覃

恭和

御製碧靜堂元韻

青空太古山丹葉埽人跡鳥飛與猿吟壁削敝萬碧嵌

巖得天設靈廟巧規隙堂皇面勢開拱揖突兀石醒耳  
非一聲黛色參老柏階茨適

堯心靜正敷

孔席

恭和

御製山近軒六韻元韻

綠雲高切上攬翠靄空浮徑轉疑無路山開近愈幽憑  
軒俯曠豁行樹染林稠爽氣凌穹宇清光正霽秋偃霄  
原接咫尺濟勝更升樓目極蒼茫外崢嶸萬象收

夏明經鑾琬圭

虞書以玉作信瑞玉人典瑞周官詳琬圭九寸藉有纁  
治德結好無鋒芒夏君好古售燕市以周制度精忖量  
五寸七分二釐半厥厚稍殺隆中央叩之其聲頗清越  
水紋深黝玉水蒼自奇得寶二千載鼂朱博雅爭比方  
示我摩挲質溫潤絕無玷駁真純良或疑好事最善幻  
考核無罅難周防繹駟渠眉差髣髴穿孔十六異斂藏  
此說然疑吾不用匹夫懷璧意則臧鑒真辨似俟君子  
還君什襲千金裝

次石菴相國自西園歸見過韻

我歸未禺中秋光霽正好君來自西園心跡靜不擾道



芻豐粟梁八月方剝棗對時欣物華蕃釐徵富媼登平  
庶有象足慰憂樂抱撫近差由豫慮遠或感嫪詩懷枉  
惠我晚覺知音少尊酒閒蔬肴得味在半飽恬知貴交  
養誰與聞道早觀河性不皺根識或可埽

次曉嵐宗伯石匣城韻

王道本蕩平設險始叔季燕京偪邊塞東北密雲衛長  
城肇自秦前明此嚴燧始謀胡不臧朵顏輕割地中葉  
守不遠華離日蹙勢戚公築石匣防要亦足恃距關四  
十里城塹環迺騎截前更掣後用爲犄角計公生

重熙朝歌壤樂無事匡藩四十九今昔跡迴異當年豈

無才慘淡補天意熊羆誤翦除孫盧窮未濟在德不在  
險天人理無二山河隨地防詎可刻舟記知公破萬卷  
雄辨誰勅對輪攻與墨守吾衰敢廁隊釋疑不求解或  
是挈瓶器行役百里近攷證苦無字不如兩忘之默息  
訣可佩

題霽園少司空遺照

庚辰初識君玉山映鮮顙合離四十年立雪門生老瀛  
洲紹世美臺諫勤績考游敷扶風治迴翔卿月皓及平  
受

知遇持衡典文藻司空偪斗台大廈和未揆嗟君宦達

晚有子聞道早讓善必歸親生天或戲島卽今披遺圖  
蓮花淨懷抱嗒然得三觀神傳豈寂稿

秋菊

秋菊非一種五色揚清芳我愛正色佳黃衣褐黃裳花  
丁競奇葩接蒿巧瓣瓢細種羅盆盎采同尫涼我惟  
尚其質徧插籬落旁旖旎耀皎日峻潔輕風霜是真高  
士品落英餐瀟湘

老少年

紅葉錫佳名耆艾童顏好老人喜對之婆娑弄杲杲鶴  
舞頂丹珠松脂映瑪瑙殷然染江楓內視孕大寶階前

植珊瑚枝樹羽舞彤葆色觀何足奇生意充懷抱少年爲  
誰誇老萊自傾倒

詠秋菊

秋花香滿屋放蕊圖充圍此華實靈物秉氣善者機憶  
昔癸未秋我園菊有輝來觀各豔說陳臬綰省薇明年  
見星去百卉皆蕭腓乃知草木性無心兆祥祿今我對  
花笑內視嬰姪肥花兮喻我意揚英久菲菲

馥馥靜鼻觀亶亶明金盆無言淡相對不下帶而存氣  
和機自朕先天眎眎溫獨坐萬花叢香意何氤氲菊乎  
爾非我至樂魚周論何必陶靖節吟賞東籬根

昔人愛菊者餐英且損芳此或違物性適己忘彼傷我  
則異於是愛護隨周防似我敷與抱挹彼清芬香我昨  
游蘇園千株燦爛光歸來觀我室碩大無與方花乎真  
有神照我珠孕房是豈非靈瑞有美通中央

我暫別花歸五日以爲期花如知我意含芬待我來素  
心傾皓月黃中金光輝庭前珊瑚株經霜高巋巋我旋  
不匝旬小陽春徘徊遙期七日復天心梅獨回

### 大道

大道非遠人求之終必至如何人自遠中路忽自廢譬  
如行千里夙興夜不寐望望日以近無爲歧途劫卓爾

如有立顏樂在希驥願以勸後來勿俾疑而跂

卽景

我來西園中落葉何紛紛獨有當軒菊碩大揚清芬豈  
不感時節天香吐瑞雲听然相視笑充符暢觀聞蕃蕪  
若物性氣機鼓氤氲默爾吾無隱意得何云云

石菴相國見和詩鈔中冒雨尋菊圖次其韻

餐英豔說屈子經榮鞠肇徵夏小正後來好事臭味同  
尋香繪聲兩清聽陳翁遺卷偶感懷犖确荒山滿芳徑  
撫時追曩情話長棖觸余心三歎咏劉公好學今衛武  
獨賞此詩冰玉映憶初相見丁卯冬東閣郎君白哲淨

下筆孺坳透蘭紙瀾翻慧業根因證先師指壁後虎題

詫我思力龍蛟勁

文正公面試予後視壁虎題讀至東龍西龍門赤日白髯老蛟碎玉斗句

呼石菴名曰汝不及矣真長吉也

少壯分馳聚會難及老同官鼓餘興

公應笑我胞綖浮我尚輪公手腕橫舊雨今雨過現來

花落花開泡幻夢公方嬰鑠不老期我慙衰蹇無心競

顛風不動居士幡雨花何與維摩病解環須鍊無生剛

善刀那管虛空硬知味何必食馬肝知道何必談受命

此釋石菴湯武受命之疑

公平曷不轉法華如來多寶牀原竝文殊

師利說法精十二功德聞思勝

此釋觀音文殊實有其人不必作也是論

無隱乎犀香聞木神不二通乎聖

此釋不可謫仙

無諍

無諍不自無如來實無得此真無我相一語可貫革觀  
人見不足觀我疇自克歛然處若谷江海下溝洫天命  
胡可貪天恩浩罔極所以無伐施顏志常抑抑

衆生各流轉誰爲斯陀含雉蜃有變化鴻鶴排雲嵐敦  
彼匏瓜蔓食苦乃得甘升沈適運會天道或可譚達觀  
自知足眠眠心所諳

喻道五首

先後六父母生我十三身八宮十二子貫之惟一神  
四山雪如鏡皓月同光輝胞嬰游重朗透頂苗以葩



日日問元神願以君爲主我將褰裳去歸君中央土  
五九四十五六六三十六周天循環行異姓皆眷屬  
樂天者何憂知足者不辱天道猶張弓江海下百谷

良鄉縣作次煦齋少農韻

廣陽福祿水此地熟經過佳氣迎

鸞翠通津靖蜃鼉月明穿衛幕烏樂逮

恩波大雅嫺高唱吾衰勉缶歌

次煦齋少農過賈島墓敬依先文莊公元韻七律

當年無本擅僧詩手攬鵬鯢荷匠知遺蛻千秋華墓近  
清吟寒谷孟鄰宜派傳宗伯懷封樹音嗣詞家妙絹碑

佳話玉堂增典故敷芳茵舊有餘思

喜庚姪假歸與之夜話有作

二年不見汝見汝情倍親治民能克己不忍忘其仁北  
堂拜壽母寒谷暄回春往來慰癡叔吐我肝肺真吾衰  
勉听夕豈復戀世塵吾言爾能諳可以質鬼神中夜起  
不倦待旦意未申庶幾各努力保汝善者因

擬楊升菴重會黃夫人

排雲畫撼號天門天棂再擊禪忠魂溟南萬里去不返  
芙蓉鏡破虧金盆其雨其雨朝陽怨長離一聲鴻雁遠  
望夫石化斷三生同心蘭夢迷九畹鄒陽吹谷暄回春

律調呂應歡如新人閒兩美天作合玉女拍手香滿茵  
仙才仙儷眞佳耦玉暖藍田珠在手從今跼進紫霞杯  
同祝天長共地久

恭和

御製養性齋元韻

仁見天地心睿通堯舜性養之而無害顧諟聆提命一  
誠貫上下五夜先祗敬明辨義利關洞矚蒼黎病王道  
示周行保赤惻入甯由近達四遠環覩咸仰

聖惟動丕應志萬象納心鏡存存以安安養民敷德政

擬升菴夫婦聯句疊元韻

子從父後排君門，撿鱗鍛翮誰招魂。楊青春長恨楊柳

色瓊樹，竟碎珊瑚盆。黃雁飛不到啼鴉怨，蜀機滇雲日

以遠。楊空將化魄逐回輪，難望枯根蘇故魄。黃夢驚天

上露濡春夜，半金雞送喜新。楊歡依膝下雙瑜舞，赧說

房中疊錦茵。黃生生脈脈交奇耦，彌天無漏兜羅手。楊

天原不老月常圓，一笑拈花相視久。黃

讀劉石菴相國和章似左袒張桂而不足，廷和者

竊謂不然，以繼統爲正者爲先帝，而不肖阿新主

也，所謂觀過知仁也多君子之徒也，以尊所生爲

說者逢合新君而忘其所授也，所謂詭過多小人

之尤者也察其心術則邪正判然矣至於入廟稱宗其漸可勝言乎大哉

純皇之諭曰凡此類者宜稱皇本生父母尊親兼盡百世不易矣敬申斯義而繫以詩

繼統大義懸國門新鬼豈得誣升魂濮園議禮本光武  
媚竈逆祀尊竊益璫萼僉人神恫怨援立元臣竄荒遠  
稱宗入廟邪說興避擊侯家仗姦吮折衷百聖標王春  
正名二字丹鉛新皇帝本生父與母大書什襲光旃茵  
勲華受命古無耦郊嚳宗堯惟授手執中精義發  
純皇萬禩權衡垂則久

十一月初十日冬至

天心一陽復天屬皆回春雷聲歡動脈鳳鳥銜新綸梅  
花一枝發香界何氤氲元吉不遠復休休以下仁衆賢  
此由豫讓善宜親親以保我孫子推類福庶民

予與崇如相公談因果慨然曰我有子杭珠慧而  
殤惜乎予曰公之杭珠不死也公不聞杜甫有詩  
乎西嶽峻嶒聳處尊諸峯羅立似兒孫稍待秋風  
涼冷後高尋白帝問真源公百歲後有騎鶴翩然  
而來迎者非他人必杭珠也因爲廣其意作招杭  
珠篇

蓮花千葉香九閼靈仙游戲多嬰孩中有一人騎白鶴  
手執玉版飛空來雲臺本是劉家洞石壁開時仙眷衆  
明星玉女捧天漿駕鹿鞭羊眞伯仲君說勞山好卜居  
東游西宿意何如我駐蜀峯應不遠一杯相屬招童烏  
題查集堂先生畫蘭冊應令孫彬屬

三樹旣珠纍三秀亦芝苗獨于岑苔閒臭味自芬苾容  
谷賞無人同心淡以謚濡濡見情性宛在高士筆哲孫  
此珍弄國香紹姬姑

又題畫竹冊

森森饒太守蕭蕭梅道人相賞林壑意誰爲似與眞墨

竹寫生趣自覺枝葉春何必對風雨籊籊頤形神泉源  
與流水淇上清無塵

時哲孫憩亭方  
之官淇縣故云

讀昌黎先生集謹次八月十五夜贈張功曹元韻

溯源天稷垂銀河天孫織錦揚清波泰山東矗玉井潤  
交舞雙鳳諧簫歌當年驅鱷忠心苦鶴唳猿啼襍風雨  
三生磨蝎轉輪高一鳴驚天萬竅號左攜玉川右郊島  
汗流籍湜僵且逃起衰八代紹騷史斟酌百鼎澄葷臊  
上爲秋陽下江漢雅有吉甫謨有臯斯文光燄燭千里  
三立如公原不死何須金石服大還歸然顏孟同一班  
獨有麟書祕科斗誰撼蝸角爭觸蠻望古茫茫鹿夢隔



施喬裊裊鱗松閒閒關景仰好無尚因依枝葉心思攀  
願追浩氣申高歌德行文學真同科知公冰鏡清光多  
苔岑臭味今非他新雨舊雨情如何

詠高司空文公允

伯恭皈沙門爲儒辨東井豈知前三月秦正申建景五

星從日行金水西南耿

本傳辨十月五星聚東井之譌  
其實秦正建亥十月實前三月

建中

及其侍恭宗不敢妄語逞甘同崔浩死世祖歎其

鯁恐負翟黑子直哉無微倖無言泣獻欬心悲自咽哽  
五異真經世侃侃密勿境清貧安寒素茅屋帝臨幸不  
名呼令公推獎榮禁省彬彬開學校臺臺算田頃五朝

光弼亮期頤蛻形影眞仙歎猶龍陰德實過丙韞哉慕  
此人嚮望空引領

詠離騷女嬃

離騷曰女嬃之嬋媛兮申申其詈余注女嬃屈原姊也此傳之者誤也古者女子從夫無與兄弟商出處之事數諫而忠告之非情也按嬃女之賤者易曰歸妹以須陸云妾也須有媵妾之解是屈原之妾同被遷逐者也身被流離之苦而憐其婢直以取禍故泣涕而道之此妾婦之忠也輒爲更釋而申其意

同心事君子甘苦誓不離夫君信博蹇姱節獨自持舉  
世好養茶謠詠叢蛾眉與君連枝葉摧折誰能辭憐君  
重修能邁此艱險時妾雖化精衛填海終無期羽淵不  
可測有子難收觚哀哉腸九折號泣空攀追

甲子春帖子

焉逢開首祐蓂子協洪疇畱熟春生琯

乙酉日  
立春

元辛朔

正陬

辛卯日  
元旦

春回十二恰逢寅

毓慶宮中喜氣新璧合珠聯賡

喜起宣房早報翁河身

三白春先兆玉豐十行

綸詔普天同

武成

文洽瀛洲樂人羨卷阿鳳翽桐

恭和

御製大雪連宵繼日成禁體詩誌喜元韻

四番瑞雪先冬集十八周時集未消

今冬連得雪四番矣十二月十二日

辰巳刻雪連夜達晝方止盈尺有餘星月始見千里方圓布澤遠

一心宥密積誠饒

今冬煥暘千人物麥牟不能無氣不閉藏之慮得此時雪真大慶也非

聖誠默籲格天不能如此之感兆也

蝗深入土麥肥苗人慶無疵氣肅

蕭此是天恩與

帝惠小臣拜手頌明昭

崇如示我讀大戴記武王踐阼篇以丹書二十字  
爲至言而疑其下以仁得之以仁守之其量百世  
以不仁得之以仁守之其量十世云云爲不可以  
訓是使亂賊有所憑以爲徼倖也其意亦善而不  
能觀其通夫所謂以仁得之以仁守之揖讓而得  
天下者也所謂以不仁得之以仁守之征誅而得  
天下者也成湯且以爲慙德是不敢以放桀爲仁  
也夫子曰三分天下有其二以服事殷周之德可

謂至德也矣。謂文王也。謂武盡美矣。未盡善也。謂武王也。聖人不敢以仁許征誅之事也。武王聞此言惕然若懼。退而爲戒書曰。前監不遠。視邇所代。敢自謂仁哉。漢景帝曰。學者不言湯武受命。未爲不知道。征誅之事。聖人不得已以救民也。若自以爲仁。則武王之志荒矣。太公陳之。而有量百世十世之分。可謂百世等差矣。周之卜世三十。以仁肇之。而以仁守之。之明效大驗也。其言何害于理而疑之乎。輒以意爲之解。

丹書揭十字敬義坤道貞危微十六言乾道純粹精萬

世傳心統日月懸光晶安仁量百世強仁十世禎湯武  
不自聖惕然銘盤楹仁量視其積三十周數羸巍巍堯  
舜禹萬古仰穆清

夢遊華山

我生七齡去盤屋華陰廟下從親遊青牛摩挲老子碣  
轉輪俯瞰百尺樓童騃何知怕像設歸來噩夢驚魑頭  
七旬契闊華山面玉井蓮豔十丈舟仙人迎我綠玉杖  
酬我甘液金觥浮嶽靈鋪席請我坐我辭立雪晶晃眸  
升堂再拜賓主洽高談雄辯陳根由此閒傳舍閱過客  
今誰主者雲臺劉笑指兒孫秀列笏淩霞翩鶴風洽柔

遽然清寒映肝膽悔不記取雙環彊

題文正師次東坡登雲龍山倡和韻

塔鈴夜語替戾岡雲龍使君出常羊後來佛起坐並牀  
太華高高俯蒼茫手澤必世同聲長我欲從之咫尺望  
春風入座與點狂

大山宮霍平陀岡喜君筆墨堪換羊把手不隔下上牀  
指點歸路非渺茫君胡沈吟山水長然疑躑躅不敢望  
捧喝莫厭顛石狂

君家三世連秦岡雙丫童子騎青羊邀我上坐獅子牀  
我眼摩挲視茫茫雪月不辨光華長子胡不歸陟岵望



老鳳疑我歌楚狂

詠七國

崇如來詩欲責六孱王而怒暴秦輒反其意解之

六王抵厥罪何用加誅求嬴氏不仁得公憤如同仇豫  
讓死知己氣尚貫斗牛人心卽天道白蛇斬者劉屈氂  
招懷魂子房復韓讐荆軻挾匕首田光扼其喉趙夢異  
秦夢蹈海慚西投誰于千載下吐剛而茹柔不如平等  
觀萬貉同一邱

用且園舊作韻題李石農觀察照卷

管涔山高天池回汾源  
鱗沸如淳杯君來自晉  
南到海且圓坐嘯青眸  
開洞天十八壘雙塔顧  
眄霓輿西松臺使君官  
清鏡潮汐甘棠遠蔭深  
培栽十年不見好根蒂  
靈泉汨汨江湖恢四野  
黍苗待膏雨濟時有本  
需良才帆張風發浪千  
仞荏苒苒沙線連交台  
我曾星槎再攬結夢游  
省識神邇徊振衣珠胎  
拾海月攜指石乳醺天  
醅鼻端有白觀空假蹟  
息雪景一往來祁祁霖  
施觸膚寸招招風靜探  
壺萊舉樽相屬暫離合  
反流歸處常依陪香界  
霏霏三日雪一枝贈爾  
天心梅

喻化

神仙解輪劫咳唾隨分身渾然我無損是二是一員分  
者忘其朔自謂我降神豈知入五濁不淨迷根因後覺  
卽先覺所性原純純倘非不遠復覆水難回津濯纓與  
濯足君其問水濱

恭和

御製嘉平月二十一日額勒登保至養心殿行抱見禮  
詩誌悲感元韻

萬里功成紀三薰

帝錫詩就瞻抱

膝見嗚咽動心悲塵戰眞勞勩丹忠奮翼爲貫珠瑩肝

膽沐

日荷

恩慈

乙酉日卯時立春

甲子歲之首乙酉春之初已卯爲春時三元泰運孚是  
月丙寅建木盛火氣舒王者布德令福汝蒼赤敷我亦  
登天門青龍蜿東隅左右策王良坦坦行蕩途司祿秉  
文昌斗戴匡玉樞仰天迓靈瑞獻歲歌康衢

恭和

御製立春日雪元韻

時和豐玉兆農祥春到

松雲喜氣颺甲紀子孳醲潤澤乙子酉熟縹韶妝

是日酉

霏簷鵲鵲高鋪五堆砌俊猊擁鎮廊盈尺定知符

睿願

至誠妙感接穹蒼

二十六日

乾清宮

御筆親揮大福字

賜

臣

珪恭紀

敷天

賜福正迎春宣室承

恩第七人

四王慶董兩相  
第七珪也

一德同心宜獻可八方異族總歸仁求多有道公斯溥  
惟善無私篤自因願以

君施比暄潤晞光渴澤念黎民

詠明史二十五首

范夢章景文

夢章負器識早以名節稱孤立不爲黨談兵實精能敷  
歷閱四朝中外倚股肱前席訝其癯憂國弦已絀淒涼  
雙塔寺古井寒堅冰光氣爭日月烈士同上升巍然作

領袖排闥叫凌兢貫珠二十一仰斗垂玉繩

劉復禮理順

眞儒擢巍科不負斯文望毀家急國憂守城助一餉文  
信何不然正氣歌慨恍妻萬與妾李四僕甘同喪羣盜  
識鄉傑環拜哭安仰緋衣歸星宮高名懸天上文行備  
無瑕大招來沆碣神交萬萬古領首笑頡頏

劉起東宗周

念臺眞天人恒星首大角翩然下麒麟先知更先覺忠  
言何骨鯁時事已否剝況遊羣陰閒溫馬競謠詠三薰  
復三黜直道方嶽嶽戟山開講舍獨倡誠敬學絕粒斗

三朝從容實堅卓換骨與易腸千秋江漢濯

黃幼平道周

石齋鍊純剛欲以補天漏豈料維柱傾洞璣數早究知其不可爲蒼赤手援救神仙五百年兵解虛空澈當年對平臺侃侃無詎譎暨乎相是曷文謝爭先後慨懷東華門殷正南斗宿

周景文順昌

六芝天牢萎五人虎邱闕巖巖吏部公憤激萬夫慟如何緹騎驅遂爲羣姦中喫血唾顯純扼吭鍛孤鳳非關批逆鱗又豈殉撓棟胡爲與狐蜴仇結殲妖洞大魔當



天衢我寡彼口衆正學旣駢誅酷吏慘一甕茂蘭刺血  
書猶得破天夢哀哉蓋棺論神解或罔恫

董元宰其昌

元宰通禪悅蕭閒不凝物東宮舊講官國子鏗鐘荆督  
學及旬宣歎歷暫伸屈引遠避權豎起家贊袞黻歸然  
杖朝老彭簪三世佛尤工書法妍孟頫紹米芾斯人緬  
高風文翰擅雙絕雖無耿介操瀟灑異充詘

文文起震孟

文起起巍甲家世名行高鳳鳴首廷唱傀儡讒口挑傳  
旨逢薄怒直諍翻呼譽浩氣屈益振講筵揚予號目諫

天足斂經義陳誅褒權姦豈或沮特擢參夔臯聲望滿  
四海弓冶傳兩髦騎箕歸列宿猶及乘完輿

申孔嘉佳肩

孔嘉募死士走賊巖杞城備邊上五策謀國扶危傾義  
命志所安求仁無他營食祿十三年入井甘冽清忠臣  
卽孝子庶無忝所生

祁宏吉彪佳

山陰標玉樹越人歌山枝治事旣精決讜議無委蛇合  
籌二大要十四民瘼咨南京請發喪桀帥降心脾移疾  
當盛年絕粒投清池一水瑩神骨大節完裘箕

徐文長渭

奇文數必奇天才鬼所妒名高與福爭魚熊那兼顧長  
嘯自古今文長獨橫慮邱明嗟失明司馬蠶室腐崔浩  
慘參夷敬通傷琴御公是疾殘形青邱干齋怒此皆苦  
磨蝸絕叫朱鳥嘯七寶數恒沙金剛不肖住如何降其  
心指點虛空路莫矜擅四絕誰反江淹賦

倪玉汝元璐

玉汝抱奇才注易大象以其言極恢博施政資治理首  
辯東林冤維垣眞孽子鄙夫孫之獬要典哭其燬孔昭  
攻冒封劉姜辨誣詆超遷職司農支絀非得已直諫遭

滄桑整冠大書几易名文正同論定公望避

徐九一汧

九一東林冠名與高顧追萐萐急周魏醵金緹騎資書  
生勇于善見義無不爲起家登瀛選抗疏貸黃倪願以  
百身贖宸嚮防其移及乎陳七事已迫苞桑時宵人恣  
彈射威福何能施慨然捨其身清冽照劍池千人爲感  
動何異齊與夷作書戒二子枋也尤白眉三生福報篤  
天爵躋臯夔

楊維斗廷樞

維斗首鄉賢復社推巨擘同里同心人競爽照肝膈當

時意氣盛聲應比鉞珀月旦傾朝野儀羽慕鴻翩一聞  
汧獨清鄧尉香魂魄名重誰能逃項瀉葦宏碧千秋泗  
洲寺遙通雙塔脈濟美光天衢台斗連珠璧

曾榮昌異撰

榮昌曾孝廉姓名同弗人

與晉江曾異撰同名

彼以孤介著此成

殉節仁永寧據江險實扼滇黔津可望勢披猖程龔行  
三人登陴誓死守城破焚其身天性爾自烈庶幾光天  
倫

曾仲含櫻

仲含名太守持正方禦侮李實欲屬之侃侃相爾汝經

紀忠獻喪繆李勦資斧用才感芝龍媒孽遭奄豎祥刑  
澗南勅勿欺山東撫暨乎晉部閣蹈海空支柱白虹如  
白練丹赤耿繩武

袁元素崇煥

元素真邊才一人關足守夜行虎豹中寧遠塹堅厚開  
疆二百里不冒棄甲走緩師完三城全遼防衆口尚方  
斬文龍聲罪如烹狗豈知亞父閒已落陳平手天命歸  
我

周比干心可剖曲端或餘冤吳玠默領首

凌駿甫義渠

駿甫清如水諫垣懲大逆豈獨疆場憂已照滄海碧晨  
趨門下啟觸柱面潰血孤操實耿耿手焚插架籍緋衣  
辭君親絕吮三尺帛神超上青鸞三生介于石

姜如農塚

萊陽有二姜蜚語詰廿四批鱗遭天棣口溺僵代弟誰  
爲薄醕謀幾傷小臣斃受命甘死戍不忍違先帝苦節  
不可貞奔走艱難際

馮爾廣元颺

慈谿稱二馮爾廣實直亢抗疏斥中官踞部何張王烏  
程鼓遁逃獨澄太湖浪溥采復社英攻者溫隆陽

撫天津滄桑不可榜脫身海道歸衰老迫屬續雖免蹈  
水巖與牀異用壯

金伯玉鉉

解元首廉孝夙以賢聖期濂洛有正學嚴憚臯比師抗  
闇睡私謁恥利營度支俄聞大同陷驚心宣府危有母  
八十餘廡并甘死綏躍身投金水冠袍汎水湄妾王從  
耄姑并死濡井泥哲弟名曰鯨抱首金木毗安知姓名  
合異世懸台魁

孟允吉兆祥

長子章明

司冠起交河守城死門下章明揮之去投縵親膝袴妻



呂與婦王同命雙貞姁一門叫天闐于邪躍大治易名  
忠與孝鶴鳴聲九野

鄭峯陽鄭

峯陽亦剛激震孟同鷹揚再起邁時厄不孝攻匡章其  
意在勝文翦翼鄭則當謂其少年時假乩母不創心悔  
納其媵父也無乖傷姻婭爲證之濁流忝渭陽寃哉竟  
極刑平反劉與黃誰爲揭覆盆畸氣多秋霜因果亦交  
襍醇醇惟中行

馬君常世奇

君常本儒者天性清而淳梁谿旣泉冽錫山亦秀皴遠

通七曲脈滙此無緇磷才名四十年奉使能潔身從容  
起投筇二姬儷霞宸遽哉少司命雲旗擁鳳麟

史憲之可法

憲之本文山前身兆母夢撫巡潛桐開東西更馳控縞  
衣誓勤王擇君非隆棟督師鎮淮陽帷幄失銜鞚旣憂  
兩姦比難解四帥聞昌言灑血書慨慷

天心動授命小東門梅嶺招魂賙萬古御雄風凌霄天  
門玃

成元升德

元升勵清操疾惡嚴於讎抗疏論閣老文溫辨薰蕕掠

杖戍邊遠再起不如柔嘉嘉南軒言大義凜春秋泣血  
歸來時有妹纒先投入哭別母張母死幾盡劉寄孤友  
人家一線存箕裘

次韻石菴咏左氏傳

聖言無偏畸微顯卽章晦所以正人心大義誰敢背左  
氏眞素臣親見息百喙讀書若不熟目論覺忽昧趙盾  
亡越境誰敢苟且忌惟其聞弑反主名難逃罪穿也視  
貪功家公甘瞽瞍是以太史書直筆討姦僞公羊主齊  
桓義與左氏對盟完卽帖荆九合聖所大飲子藥而卒  
豈比嘗藥類明案爭紅丸誤殺詎可誨左紀定十年祝

其見行事歸田及墮都謀國非素厲陪臣執國柄蕭牆  
憂如繪討桓告三子政久大夫逮所貴善讀書躋蔽宜  
知味

奉和石菴次范石湖韻三絕

邯鄲廟

老說谷神元不死世緣夢夢皆幻矣先覺後覺千里差  
齟草蹇驢鳴貫耳

扁鵲墓

上池一飲神解治膏肓二豎逃秦醫小道大道了不二  
三人無爲無不爲

坡公祠堂

定州八督顧言他內翰勲名春夢多海外歸來文更肆  
騎麟俯視意云何

除夕

除夕每不寐今宵興若何洞中綵舞樂天上觀揚多

知足齋詩集卷第二十終

小門生烏張鑑校字

知足齋詩集後序

詩三百篇雅頌之作皆古名臣大儒之所爲也  
唐宋以來名臣大儒多有詩集詩者志也可以  
覘其志而不能揜詩者持也可以驗其所持而  
不可拔性情心術政績遭遇皆可于詩見之願  
古人詩集雖多而賡颺之作究不能累牘疊見  
且古帝王有詩集者蓋鮮卽有之而與名臣大  
儒言懷論道之作更不多見是惟吾

師大興朱公知足齋詩集爲最盛矣我

師未弱冠入詞林與兄竹君先生競爽早被

高宗純皇帝任使數歷中外

純皇帝深器德量

命直

上書房侍

皇上講誦有甘盤舊學之義焉方出使在外時

純皇帝嘗以

御製詩郵示往返命和褒錫甚渥

皇上望遠寄懷專爲

師而發之歌詩者不下數十首

師亦皆賡雅音而數至道都俞陳音何其盛也

雖吾

師學遂行修得以際茲

隆遇實由

兩朝睿製曠古所無是以交慶

明良徵韶成樂此集卷帙閒得以發其光華而極其  
典重也元奉

命巡撫浙江

師嘗以詩寄示爰請于

師得授全集將采之于板

師復命元選訂之元乃與及門陳編修壽祺等



共商刪存以癸亥以前編爲二十卷

師之詩閎中肆外才力之大無所不舉且直吐  
胸臆真情至性勃勃動人未嘗求肖于流派而  
自觀者衡量之實于杜陵昌黎爲尤近刻旣成  
欣聞甲子春

皇上繼美

前徽臨幸翰苑

師之資最深且掌院事

恩加太子太傅領袖清班極一時詞臣之榮遇西園  
東壁謨獻之作必多甲子後之新編更應美實

古名臣大儒之專集未有盛于此者然覽者當知吾

師之志與

師之所以持庶幾于雅頌閒求之矣

嘉慶九年春受業揚州阮元謹序